

# Ɔwulú Nyɔɔsiá Paulo

## Lówanlín Sísi

### Timoteo

**1** <sup>1</sup>Mí Paulo mú á, Bulu apé su ngyi Kristo Yesu sumbí ɔɔɔpú. Ɖlɔwa mí ɔbéɛ, nyéda nkpa á múú ɔlehie tsun Kristo Yesusu ámu ɔkan.

<sup>2</sup>Mídé ɔwulú á nfi wanlín sísi fú, mí bí ɔdwepú Timoteo. Aní Sí Bulu mva aní Wíe Kristo Yesu buwúun fu nwe, abugyi fu buale ha fú iwilwii.

#### Ɔpánda Pú Ateto-ɔnlun Wa

<sup>3</sup>Nedá Bulu ipán. Mu ndepu klun á ní umedé mí ipón ha súm, fé mí anáin. Timoteo, ní nde mpái bɔ ɔpa múa onyé á, ntekáin fúsú brégyíbré. <sup>4</sup>Ní nekáin ntsúá felun bréá ndenatí sí fúsú a, ntekleá nówun fu, méni ansigyí bóbulá mító. <sup>5</sup>Ntekáin hógýiá fubu ɔɔkwalisu. Hógýi anfi odu légyankpá tsíá fú ná Loito ní. Uetrá tsíá fú yín Eunike étó. Nahogyiá mú odu bu futɔ ní. <sup>6</sup>Íni su nde fú kaín á ní foháa Bulu atokiehé á múú ɔleha fú bré á múú nɔpu ibi dínká fúsú ámu ɔnó iwa ogyá tsíá mútó. <sup>7</sup>Tsúfé Bulu méha aní ɔɔéá abópunyá ifú, mboún múá itehá aní túmi, ɔdwe pú iwisugyi.

<sup>8</sup>Mú su máha aní Wíe asún ámu blí iwa fú péli. Máha mí obudi é iwa fú péli. Mboún wa klun Bulu túmitɔ, afotsula wun iwɔsun á ní ilehián \*asun wankláán ámu su. <sup>9</sup>Bulu lóho aní nkpa. Ɖleti aní ɔbéɛ, abémlí mu aha wankíhé. Megyi tɔtɔ anulóbwe su. Mboún igyi tɔá mu onutó ɔlɔbwe agywun á ní ɔbóbwe asa ɔyi lebelun. Ɖbéɛ, ɔbówa awitɔle há aní, dwé aní tsun ania Kristo Yesunyɔ ikulebwesu. <sup>10</sup>Táme séi á, Bulu lalé mu awitɔle ámu ɔwan tsun aní Ɖhópu Kristo Yesu íbasu.

Muléyintá lowu túmi, ɔlele nkpa ání utamatá ɔwan súná anɩ tsun asun wankláán ámusu.

<sup>11</sup>Bulu layáí mí mu asun wankláán ámu ɔkan ɔdapú, mú sumbí ɔyɔpú pú mú osunápú. <sup>12</sup>Mú sù nde iwɔɔsun ánfɩ odu wúun ni. Táme mmedé péli nya, tsúfé nyin ɔhá ání nahogyi. Nyin ání ɔbétalí gyo itó ámúú ɔɔpɔwá mí ibito ámu iwɩ alu yófun mu ɔbáke. <sup>13</sup>Kita ɔɔkwali asún ámúú nosuná fú ámutɔ. Yo músú afuho Kristo gyi tsa. Dwe fú aba, tsúfé fúa Kristo Yesunyɔ mlɩlabwé kole. <sup>14</sup>Ɔɔɔe Wankíhé ámúú ɔbu anito ámu ɔtsáa fú, afutali gyo ito wankláán ámúú ɔleha fú ámu iwɩ.

<sup>15</sup>Fuyin ání ahá ámúú bubu Asia, Figelo múa Hermogene bubu amótó amu féé banátí sí mí. <sup>16</sup>Anɩ Wíe owúun Onesiforo wóyító ahá nwe, tsúfé mulétsiá wá mí ansigyí. Omenya mí obudi péli. <sup>17</sup>Bréá ɔleba Roma wúluto á, olodunká mí kpéfɩn bréá olowun ni. <sup>18</sup>Anɩ Wíe owúun mu nwe mu ɔbáke amu! Fuyin alá ɔɔbuá mi nkpa tsɔtsɔtsɔwɩ Efeso wúluto.

### Isá Ɔkɔpú Wankláán

**2** <sup>1</sup>Íni su mí bí, ha Bulu awitɔle ámúú ɔɔpɔtsun Kristo Yesusu ámu iwa fú ɔwunlín. <sup>2</sup>Pu asún ámúú neblí, fonu ahá tsɔtsɔtsɔwɩ ansító ámu wa ahá ání bubu ɔɔkwali ibito, ménɩ amú é bétalí súná aha bambá.

<sup>3</sup>Tomi afuwun iwɔɔsun ámúú anidéwúun amu, fé Kristo Yesu isá ɔkɔpú wankláán. <sup>4</sup>Isá ɔkɔpú ɔkuku tamatráa kɩ ɔma, tsúfé odekléa obégyi mu ɔhande ansí. <sup>5</sup>Alɩ kén ɔsrú otsíipú ɔkuku tamanyá usgyí atokiehé, nkéti alagyi ɔsrú amu mblasu ní. <sup>6</sup>Ɔɔɔɔpɔwá ɔbu nsi tégyankpá dá atɔ pɔpwe ɔnó. <sup>7</sup>Gywun asún ánfɩ nabláa fú ánfɩ iwɩ. Anɩ Wíe é ɔbéha fonu mú féé asi.

<sup>8</sup>Kan Yesu Kristo, Owíe \*Dawid mu na ámusu. Mu Bulu lókusúba tsu afúlito. Múgyí asun wankláán ámúú ndeblí ámu ni. <sup>9</sup>Asún ánfɩ sù nde iwɔɔsun wúun, bawá mí ikan fé lalahe ɔbwepó ní. Táme bumɔkúwá Bulu asún ámu mú ikan. <sup>10</sup>Ahá ámúú Bulu lalé ámu su natomi ɔkpagyíɔkpasu nde iwɔɔsun

wúun, méni Bulu ɔbɔtsun Kristo Yesusu ho amú nkpa, amú ibi béda numnyam amóú utamatá ámu. <sup>11</sup> Asún ánfí bu mótó.

“Ní ania munyɔ awú á,  
ania munyɔ obétsiá nkpa.

<sup>12</sup> Ní atomi wun iwɔɔsun á,  
ania munyɔ abégyi iwíe.

Ní akíná mu a,  
mu é obékiná aní.

<sup>13</sup> Ní animá ɔɔkwali a,  
mu mú á, ɔɔkwaliɔ ogyi,  
tsúfé ɔtamatú atsonó tswi, lápú mu ɔdandu tsú  
mú ekekekeke.”

### Agyú má ɔyɔpúá Olegyi Bulu Ansí

<sup>14</sup> Tsia kaun amú asún ánfí. Tɔi kpla amú Bulu ansító fɛɛ, bumátsiá tré asúnsú. Labi kuku uma mótó, tsúfé mú odu abwepú butehí. <sup>15</sup> Bɔ mbódí afɔho idá Bulu ansító, fé agyú má ɔyɔpúá mu agyú má ma mu péli, otosúná ɔɔkwali asún ámu wankláán. <sup>16</sup> Asún ání uma asi, imosuná Bulusúm mádali fú ɔnó, tsúfé itehá oha mua Bulunyɔ nsuné tɔwá ífó. <sup>17</sup> Alí ámúb ɔɔ tekléí ámu a, alí asún ánfí ablípú asún é tekléí ní. Amú aku gyí Himeneo mua Fileto. <sup>18</sup> Bafwí dali ɔɔkwali ɔkpa ámusu yó budebli bɛɛ, kusú tsú afúlitɔ laba bɔtsun, bude aku hógyi yintá. <sup>19</sup> Táme ntswiasɩ ámúb Bulu lówa há hógyi amu ulí kínkíínkín. Asún ání bɔwanlín dínká ntswiasɩ ámusu gyí, “Aní Wíe yin ahá ání bɔgyi mu kle.” Nyɔɔsi é gyí, “ɔhagyíɔha ání ɔteti mu iwɩ ɔbéɛ Okristoyin a, osíi lalahe bwe.”

<sup>20</sup> Megyí sika pepe múa sika futútú ató pé tetsiá wóyí yílétó. Oyí múa isi ató é tetsiá inu. Butobú iku dun ku. <sup>21</sup> Ní ɔku ɔlé mu iwɩ lé



*Sika pepe múa sika futútú  
pó oyí múa isi ató ní.  
(2 Timoteo 2:20)*

lalaheweto á, Bulu telé mú yái. Alabwé chá ání alási iwí há, ɔbu labi, mu Wie Bulu ɔbɔpu mu gyi gyuma wankláán kugyíku. <sup>22</sup>Íni su le fú iwí tsu nyasubi móa mbitebí mbagyító. Fówun fúa ahá ámúb butɔpú uklun wankíhé kpólí Bulu ámu ansí bédinká yilébwe, hógyi, ɔdwe pú iwílwíisu. <sup>23</sup>Le fú iwí tsu nwéengyi ání uma labi, ito wankláán kuku méedalí tsu mótótó, tsúfé fuyin ání itré pé itetí. <sup>24</sup>Uma aleá aní Wíe osúmpú ɔbɔbwe ɔtrépú. Mboún ilehián ání ɔbɔwa awitɔle há ɔhagyíɔha, ɔbɔbwe osunápú wankláán, otenyá klun há ahá ání amú asún bu ɔnlun. <sup>25</sup>Ilehián ání obénya klun tóí kplá ahá ání butɔkúsú líí Bulu asún ámusu. Fíalí Bulu obówun amú nwe, há amú bédamlí kluntɔ, bí ɔɔkwali amu, <sup>26</sup>íha amú ansí iba asi. Fíalí íbéha amú bédalí tsu ɔbunsám amúb ɔbéé bugyíi mu asúnsú, abubwe mu apé ámu ayibito.

### Nke Tráhe Amuto Asún

**3** <sup>1</sup>Táme mí bí Timoteo, bí ání ɔyító bɔwa ɔnlun nke tráhe amuto. <sup>2</sup>Tsúfé ahá bɔbwe awunsípú, bɔbwe kɔba adwepú. Bóhɔ amú iwísu gyi, bótsu iwí, bésia ahá, bumóonu amú akwípú asún, buméeyi ahá aye, amú iwí méetin, <sup>3</sup>bumóɔdwe ahá, buméesi asún kíé, bɔbwe ahá iwí asún ablípú, buméetalí gyi iwísu, bɔbwe awuntɔlupu, bumóɔdwe ito wankláán kuku. <sup>4</sup>Béle ahá há, bumóosusúu asún iwí, béki amú iwíá budun ɔhagyíɔha, bɔdwe ɔyító ansigyí sí Bulu. <sup>5</sup>Bɔbwe iwí fé Bulu budesúm, táme békiná mu túmi. Le iwí le ahá ánfí oduto. <sup>6</sup>Amú odu butebítíwíé ahá wóyító, dámlí atsiá amú ansító ma ɔnlun agywun. Atsi ámu odu á, lakpan lamlí amú ato suráhé, ɔwólí laláhe labúlá amótó. <sup>7</sup>Butekleá bónu ɔhagyíɔha atosunáhé, táme buméetalí bí ɔɔkwali amu ekekeke. <sup>8</sup>Alí amúb Yane mu Yambre bɔkúsú líí aní náin Mosesu ámu a, alí ahá ánfí é bakúsú líí ɔɔkwali asún ámusu ní. Amú agywun lawú. Hógyito é á, buma ɔlíkpá. <sup>9</sup>Táme bumóɔɔyɔ nkpá dun alí, tsúfé amú mimlá béln ɔwan, ɔhagyíɔha obówun. Alí íleba Yane mu Yambresu ní.

## Paulo Asún Tráhe

<sup>10</sup>Timoteo, fú mú fuyin mí atosunáhé féeé, mí tsiátó, t́á ɔkpa ngya, mí hógyi, mí iklunya, mí ahá iwí ɔdwe pú alíá notomi wun ipian, <sup>11</sup>alíá ahá bedunká mísú pú mí asun wunhe. Múá ɔlɛba misu Antiokia, Ikonion pú Listra ɔmátó. Notomi, aní Wíe léle mí tsú mú féeétó. <sup>12</sup>Lélé mú á, ɔhagyíɔha aní odekléá obóbuo aní Wíe Kristo Yesu, ɔbwée Bulu apé á, ahá butedínká musu. <sup>13</sup>Táme aha laláhe pú ahá asisípu mú á, bóyo amú lalahɛbwesu dun ali. Bénatí mlé ahá, ahá é bémlé amú. <sup>14</sup>Táme fú mú á, kítá fú ɔnɔkwali amúb fakásí, fú onutó fahɔ músú gyí amutɔ kínkíinkín, tsúfé fuyin ahá ámúb bosuná fú ató ámu wankláán. <sup>15</sup>Tsú fú nyebitɔ ɔpá febi Bulu asun wanlínhé amu. Mú ɔbétalí há fú nyánsa f́pɔhɔ Kristo Yesu gyi ni. Mú su Bulu ɔbóhɔ fu nkpa é ní. <sup>16</sup>Bulu asun wanlínhé ámu féeé itsú Bulu onutó wá. Ibu aléá bópusúná ɔha, púkíná asún há ɔha, pútswíí ɔha, púbúlá ɔha, íbéha yilébwe bémantá mu, <sup>17</sup>méni íbéla Bulu ɔha bwé wankláán, ɔbófɔn ha gyumagyihe wankláán kugyíku.

**4** <sup>1</sup>Nlí Bulu muva Kristo Yesuá ɔbéba begyi akɔankpapu pú awupú asún, obébegyi iwíe ansító, nde fú ɔlá da mbéé, <sup>2</sup>fudáa Bulu asún ámu ɔkan. Ní fúbu ɔkpa o, fuma ɔkpa o, mási mú blí. Nya klun afutswii amú. Kina asún ha amú. Wa amú atetɔ-ɔnlin, afusuna amú atosunáhé wankláán ámu. <sup>3</sup>Tsúfé bré ku íbá, ahá buméetrá ya asu nú atosunáhé wankláán ámu. Bɔbwe t́á íletsíá amú, náttí dúnká ató asunápú oduá bósuná amú t́á budekléá bónu. <sup>4</sup>Békiná ɔnɔkwali asún ámu yóbuo ɔte. <sup>5</sup>Táme fú mú á, ha fú ansí íba asu ɔkpagyíɔkpasu. Tomi afɔwun iwɔɔsun. Blí asun wankláán ámu wankláán, afubwe agyómá ámúb Bulu léha fú ámu mɔ ɔnɔ.

<sup>6</sup>Mí mú á, bré lafun aní bópu mí obugya wúlí asu fé ntá há Bulu fé afɔdte-abotó. Mí lowu lafun. <sup>7</sup>Nakó íkó wankláán ámu tá. Natsíí ɔsrú amu é tá. Nakítá hógyi amutɔ kínkíinkín. <sup>8</sup>Séi á, t́á ída gyo mi gyí usogyí atokiehéá Bulu ɔpóhá ahá aní babwé yilé, aní Wíe Yesu, ogyi asún ogyípú ɔnɔkwali pu amu ɔbópuhá mí eke yilé ámúb obéyinkí ba amu. Táme

megyí mí nkule ɔ́bɔ́bwe íni há. Ɖbéha ahá ámuú bude mu yinkí bá ɔkpa kú amu é féeé.


### Paulo Onutó Iwɪ Asún

<sup>9</sup>Bɔ mbódí afukɔsi ba mí wá, <sup>10</sup>tsúfé ɔyítɔ atɔ de Dema ansigyí wa. Mú su alayínkí mí ɔma, náti ɔyɔ Tesalonika wúluto. Kreske ɔyɔ Galatia, Tito é ɔyɔ Dalmatia. <sup>11</sup>Luka nkule bu mí wá nfi. Mú su ní febá á, kpa Marko buo iwɪ, tsúfé ɔtetsá mí agyómá yɔ. <sup>12</sup>Nawá Tihiko sísi Efeso. <sup>13</sup>Tsu mí ligá pú mí nwulú ámuú nesi tswɪ Karpo wá Troa wúluto ámu ba mi. Mátan nwulú ámuú idun nwulú-kpákpású amu ésú.

<sup>14</sup>Kɔ́ɔbrɪ atɔ ɔbwepú Aleksandro lópu lalahe ku gyi mi. Ulehan mi wankláán. Anɪ Wíe ɔbéka mu ukɔ. <sup>15</sup>Kí fú iwɪ wankláán musu, tsúfé ɔɔkɔsú líi anɪ asun blíhé féeésú.

<sup>16</sup>Bréá ahande beha bee nlée mí ɔnɔ́ á, ɔhaa mélu mí ɔma. Amú féeé besrí sí mí. Bulu osíkíe amú. <sup>17</sup>Táme anɪ Wíe lélu mí ɔma, ɔɔwa mí ɔwunlín. Mú su netalí bláa

amú asún ání nde féeé, méni ahá ání bumegyí Yudafo féeé bónu. Alí Bulu lópulé mí tsú lowuto ní. <sup>18</sup>Anɪ Wíe ɔbéle mí tsú lalahe kugyíkuto. Ɖbékpa mí putɔɔ alu yówie mu ɔsúsú iwíegyí ámutɔ. Numnyam ibwée mu kle bré féeétɔ. \*Amen.



*Nwulú mɔ́a ɔwanlɪn-atɔ  
ni. (2 Timoteo 4:13)*

### Uklá

<sup>19</sup>Nehá Priska mɔ́a mu kulu Akwila pú Onesiforo wóyítɔ ahá féeé itsiá. <sup>20</sup>Erasto lésin Korinto wúluto, Trofimo é délɔ. Mú su nesi mu yái Mileto wúluto. <sup>21</sup>Bɔ mbódí afɔba asa atsálbí ifun. Eyubulo mɔ́a Pude, Lino mɔ́a Klaudia pú apíó ámu féeé behá fú itsiá.

<sup>22</sup>Anɪ Wíe ɔkpáa mli, ogyi mli buale.